



Vschinauncha da S-chanf

7525 S-chanf



ENGADIN
St. Moritz

Da la suprastanza cumünela

Dumandas / annunzchas da fabrica

La suprastanza aderischa a seguainta dumanda:

- Nouva remisa, parcella nr. 150, Pradels, S-chanf

Cunvegna laina per arder / ziplas

Il böt es d'avair ün contrat per la cumprita da laina per arder traunter la vschinauncha politica da S-chanf, la vschinauncha politica da Zuoz e sar Joos Simon Salzgeber. Per pudair eviter lungs transports e per pudair diminuir emissiuns da CO², fo que segn cha sar Joos Simon Salzgeber retira las ziplas da l'uffizi forestel S-chanf/Zuoz e da la resgia da S-chanf. Las duos vschniaunchas haun elavuro üna proposta d'üna cunvegna per quista cumprita da laina. La cunvegna ho üna düreda da 20 ans e vegn suottamissa a la radunanza cumünela ils 24 october 2018.

Senda pass Chaschauna

Per il traffic da velos es la senda existenta traunter Margun ed il pass Chaschauna memma stipa, que chi causescha grandas erosiuns. La senda nun es bod pü tarnsibla, neir per peduns. Ils cuosts per mantegner la senda existenta sun fich ots. Id es previs da fer ün preproget, chi prevezza üna nouva senda cun üna pendenza pü bassa e pü cu facil da lever la senda veglia. Il preproget ho il scopo d'avair üna soluziun chi po gnir accepteda da las instanzas, d'avair ün preventiv da cuosts, chi cumpiglia tuot las lavuors, eir quellas per sgürer e metter in uorden la part da la costa dannageda da l'erosiun. Il cuosts per il preproget, chi vegn surdo a la firma Ecoalpin da Schlarigna, s'amuntan sün fr. 16'000.00 incl. isp.

Sanaziun Via Chamblers

Cun las lavuors per il condot per ils cabels da la Swissgrid es gnida saneda eir üna part da la via Chamblers. La part da la via chi nun es aint il proget da la Swissgrid, e chi'd es gnida saneda cun las lavuors, stu auncha gnir gerreda cun la poza da las chünettas a travers. Il cuosts per quistas lavuors s'amuntan sün fr. 12'673.95 incl. isp. La suprastanza cumünela decida unanimamaing da surder las lavuors a la firma Angelini SA per il predschi sur manzuno.

Infrastructura d'IT illa chesa da scoula

La firma informatica AG, chi ho fat las lavuors per l'infrastructura d'IT illa chesa cumünela, fo eir las lavuors illa chesa da scoula. Eir cha la chesa da scoula es sül stedi il plü nouv, ho la firma informatica AG inoltro ün'offerta per la sanaziun da l'IT illa chesa da scoula chi resguarda las pretaisas dal plan d'educaziun 21. Impü es eir giavüscho chi vain installo güst üna nouva rait da WLAN illa chesa da scoula. La suprastanza cumünela decida da surder las lavuors a la firma informatica AG sur fr. 15'025.25 incl. isp. Impü vegnan tiers ils cuosts annuels da fr. 468.05 incl. isp. Ils cuosts sun bütgetos i'l preventiv 2018.

WLAN illa chesa cumünela da S-chanf

Pel mumaint es illa chesa cumünela üngün signal da WLAN. Our dal motiv, cha adüna dapü persunas lavuran cun tablets e cun laptops düraunt tschantedas ed otras lavurs fo que sen, schi's es già landervi dal saner tuot l'infrastructura d'IT, chi's fo eir güst WLAN in tuot la chesa cumünela. Il cuosts per l'installaziun dal WLAN illa chesa cumünela s'amuntan sün fr. 2'603.15 incl. isp. e vegnan surdetas a la firma informatica AG.

Iniziativa dals 19 marz 2018

Illa tschanteda dals 12 settember 2018 ho la suprastanza cumünela decis, cha l'iniziativa es valida. Sün que es gnieu scrit üna disposiziun als iniziants per piglier pusiziun infra 10 dis. Cun data dals 28 settember 2018 es entro illa chanzlia cumünela la resposta dals iniziants. La suprastanza cumünela ho tratto la pusiziun dals iniziants illa tschanteda dals 10 october e decida unanimamaing da der resposta cun üna disposiziun correspudenta. Impü decida la suprastanza cumünela da tractander la chosa regard l'iniziativa dals 19 marz 2018 a la prosma radunanza cumünela ils 24 october 2018.

S-chanf, 12 october 2018

La suprastanza cumünela